

中國方志叢書·華中地方·第四一三號

據清·徐傳編、王金庸補輯
清光緒二十六年修，民國十八年重印本
影印

江蘇省

光福志

(全)

成文出版社有限公司印行



10097937

中華民國七十二年三月臺一版

光 福 志 全一冊

發行人：黃 成 助

出版者：成文出版社有限公司

台北郵政信箱二二六〇五號

台北郵政信箱二二六〇五號


台北市杭州南路一段6巷9號3F

電話：三九一六四一六（五線）

印刷者：上林彩色印刷有限公司

台北市大理街145號

新聞局出版登記證：局版台業字第二四三號



蘇城臨頓路

毛上珍承印

序

光福之名始見於陸魯望送小雞山人序所謂出吳胥門背朝日行四十里得野步市曰光福是也曩余嘗客吳中探梅過此愛其風土淳樸景物清幽如古桃源別有天地顧其間佳山水余既未及徧游偶爾游筇所涉昔賢遺蹟半就湮蕪訪諸樵牧徵信無人蔓草斜陽歎歎憑弔而已今徐君月坡寄示手輯是編不禁展卷喜曰可以當臥游焉志十二卷諸凡重巒複嶂曲港支流圯梁古剎珍果異卉第宅冢墓之遺農桑賦稅之饒人物藝文之美畢備此一隅耳而可紀載者已如此嘻其盛歟抑或馳驅中外所歷名勝如光福者豈少概見要之地以人傳非其人則弗章有其人矣無後來者旁搜遠紹歷久猶易泯也卽以是編徵諸近代上沙却因徐侯齋而著香雪海以宋牧仲而名查山六浮閣竹垞爲記乃傳漁洋山王阮亭取以自號遂與嵩華爭高然二百年來流風餘韻亦復少衰月坡徵文考獻使人景仰遺蹟以與昔賢感動奮發其用心良厚

於風教不無裨益雖謂光福名區得月坡而益彰也可唯是披君新著觸我舊
游覺鄧尉梅花游湘月色斷煙續碧歷歷在目猶恨當日未得賢主人如君者
爲導師盡覽林壑并賁此書作勝具也爲識數語歸之

賜進士出身

誥授光祿大夫

經筵講官

體仁閣大學士管理兵部兼管順天府府尹事務

玉牒館副總裁

紫禁城騎馬加十級卓秉恬撰并書

序

光福一山鎮耳然地居吳中山水最勝處爲千餘里來山靈之窟宅而紀載無專書坐使名蹟漸就湮沒間有一二散見昔賢篇帙者亦皆傳聞異詞徐君月坡世家是山掇拾舊聞成書十有二卷徵文考獻幾無遺憾迺自視歆然介家春水以書寄質於余且乞余一言余適有浙西之行篷牕展讀一過輒歎其援引賅洽雖述而不作其薈萃之功可謂勤矣春水又言徐君之父嘗有志於此略有就緒賡志旋沒月坡仰承先志卒至於成不獨文獻有徵其繼志述事亦作稱己余家峰泖間距光福不二百里顧頻年宦游萬里陟醫巫閭度仙霞登日觀近復歷嵩少南謁衡嶽望九疑經桂林二十四巖洞而卒未獲探梅鄧尉煮泉銅坑茲以奉諱旋里得覩是編既嘉月坡用心之專重以春水之屬乃不辭而爲之序蓋不啻登縹緲峰而陟香雪海也

賜進士出身

誥授通奉大夫前廣西等處承宣布政使司布政使隨帶加四級華亭張祥和
撰

序

鄉鎮之有志非古也嘗考周之職方掌天下之圖而六鄉之官五百家有黨正則曰書其德行道藝百家有族師則曰書其孝悌睦婣有學者二十五家有閭胥則曰書其敬敏任卹者大抵山川則志之職方人物則志之黨正族師閭胥鄉之有志何必非古歟吳縣徐君月坡博雅士也以所輯光福志稿郵寄示余請爲之序按光福以山名寺以寺名鎮地濱太湖廣袤五十餘里山川之秀人物之盛甲於吳郡且非古之若閭若族若黨者比則其有志也固宜或曰光福一名鄧尉爲吳名山何不以鄧尉名志曰志山則專乎山山以外靡得而記也曩嘗探梅其處愛其風景清曠山之陽則有郁泰元墓在焉遠眺穹窿西蹟諸峰若隱若見不識當年子房從赤松子遊遺蹟尙存否翁子讀書臺魯望采樵徑猶歷歷可辨否查山六浮閣因竹垞題詩得名漁洋則以阮亭尙書而著流風餘韻至今不落寔否深以不能徧歷爲憾今披是編迺一一彷彿遇之昔日

沈周諸公專志鄧尉者皆不之及以格於體例然也則志之名以光福也尤宜是志也徐君自謂承其先志閱三十年而後成者余於是歎吳之有光福歷有年所且天下名區如光福者不少非有如徐君搜羅之富用心之專則志莫能成矣而又幸志之既成山川人物歷歷可考爲有合乎職方所圖及六鄉紀載之遺意不得以鄉鎮之志非古而疑之也是爲序

道光二十六年歲次丙午小春望日

賜進士出身

誥授中憲大夫河南卽用道前開封府知府加三級錫山鄒鳴鶴撰

自序

光福鎮古之虎谿蕭梁時建寺於此時未有鎮也迨聚落繁盛始以寺名名鎮考之國家自一統志而析爲省爲府爲州爲縣志皆司土者采輯由縣析而爲一鄉一鎮一山一水則人自得著故或備或缺也光福向無志文獻無徵先君子嘗有是志而未成書爲憾夫志者記也記其山川人物土產風俗也光福僻處郡西隸於吳治葺爾一隅然湖山之秀物產之饒風俗之純樸人性之敦厚及乎琳宮佛刹池館臺榭冠絕吳中其山有穹窿西磧銅井鄧尉之挺秀其水有具區游湖東西崦之浩淼七寶法雨象泉之甘冽地則東南平夷宜蔬穀西南多山藝花木桑麻遍處播植漁罟樵斤終年不廢民廬櫛比倚山而居濱水而田樸者安於畎畝秀者澤以詩書至幅員之廣袤也五十餘里陂塘崦渠足資灌溉山村水市直盡太湖而物產之佳則稻有紅蓮藕有傷花盧橘楊梅菰蒲菱芡皆美於他產更有著名當世閱千載而獨擅者梅也故著於圖經散見

於騷人墨客之篇詠可勝紀哉向自郡邑志之外雖震澤有編具區有志惟光福之文獻闕佚予心竊耿耿無如譴陋少文早歲又飢驅奔走有志未逮然自少壯以來凡見碑銘文集圖經志乘以及譜傳偶有及於光福者蒐羅節錄三十餘年稿凡數易甲辰冬夜篝燈發篋中裒集十二卷釐爲二十門名之曰光福志第余家貧素無藏書購假亦難多得惟就聞見所及者錄之以繼先君子未竟之志并爲好古賢哲之士作嚆矢之一助焉


里人徐 傳識



咸豐庚申辛酉兩載避粵寇於鄧尉之真如塢獲交徐君調之出际是編讀之知爲其先德月坡先生手輯雖非全璧而實名勝之區不可少之書時先君子養疴山中欣然握管命鐫次第繕鈔將原稿歸趙承平後光緒初許退閑丈介紹潘中丞偉如借觀孰知久假不歸竊維是書鈔寫半出於先人之手鐫不能保存之惡得無罪迨乙未歲申子仲葵得許氏鈔本丐予分鈔而同補沿革一門予欣然而樂助其半今茲長夏病體稍可向仲葵鈔本借來三月閱而繕成之於是遺墨雖無復存而有是書存於家是可稍蓋予之愆也回溯侍從時已三十餘年矣書此以志喜且以志感

光緒二十四年長至節鶴齋識於一枝巢





光福志序

光福爲吳郡城西名勝之區山環水抱負絕塵寰其西南諸峯林壑尤美古蹟最多身入其中如遊仙界自漢以來名公鉅卿高人逸士生於是潛蹤歿於是藏魄者不知凡幾况又有翠華臨幸之叢林宸翰品題之花木皆足以生湖山之色增人地之光登記載而爲掌故者乎余少讀徐高士俟齋先生鄧尉十景記未嘗不心嚮往之悠然其意遠余屢入山中訪所謂十景者田夫野老類能言之然語焉不詳而兵燹之後書闕有間無徵不信又慨焉傷之今年春余偕汪孝廉鼎丞探梅鄧尉重游光福里中友人觴余二人於崦西崦之上席間出示徐月波先生光福志十二卷蓋此書原稿久秘未刊不知存否今從邑耆儒王先生心竹所假得副本錄存此冊并倩張壬士明經校訂而續志之以成善本舊同學申君子珮及其同志諸君子議集資以梓行之書來督序竊思此雖一鄉之志而實郡西諸山之志也較之他志尤難採輯徐先生之著此書也不

知費幾許精神幾許歲月而可聽其淹沒不傳乎余雖無暇卒讀此書而知此書之必可傳與諸君子之所以梓而傳此書者其意良善而其事亦可書也故樂得而序之

丙寅冬至日崑山王德森撰於吳門年七十有一

光福志目錄

凡例

卷首 天章

卷一 沿革 風俗 街市 橋梁 村巷

卷二 山

卷三 水 水利

卷四 田賦 土產

卷五 官署 第宅

卷六 人物 列女

卷七 著述 金石 冢墓
祠

卷八 寺觀

卷九 藝文